

L'agasse èt l' tassion

On bia gros djon.ne maule di tassion
Qui s' purdeut po li rwè dè s' vias
Aveut passé l' gnût d'lé s' mayon.
Drané mwârt, i chûveut l' chavia
Què l' ramineut après s' tèréye.
Tot d'on côp, gn-a s' nez qui chôpiye.
« Qwè ç' qui c'èst d' ça por one inéye ?
Ci n'est sûr nin dè l' tchinistrîye »
Sondje-t-i nosse gros, tot lèvant s' tièsse.
Waîte on paut ! Su l' coche dins l'ôrnîa,
Gn-a one caléye agasse què l' twèse
Avou s'-t-ouy nwâr come on fornîa.
Èt dins s' bètch, one bèle crausse bolète.
Li song dau pouyu n' fait qu'on toûr.
« Taudje ! Dji m' lî va scroter s' cassète
Rin qu'en lî fiant on bia discoûrs ! »
Di-st-i l'abateû di staurés
Tot èmetant come on consèlier ...
« Hum...hum... bondjoû nozéye mam'zèle!
Come vosse pêrcé blanc caracô
Vos fait vosse gôje si télemint bèle !
Vosse cwârps, vosse cô, mi rindenut fô.
À costé di ç' qui Diè v's-a d'né,
Totes vos soûs ni r'chonenut à rin.
Èt dj'a l'idéye qui quand v' tchantez,
On dîreut l' vwès d'on vèrzèlin. » (*sizerin boréal*)
Li mouchon fait chonance di rin ;
I toûne si drî après l' vaurin :
« 'l a sûr one solide bioke, mi-n-ome !
S'i crwèt qu' dji m' va drouvu m' bètch,
I 'nn'a one di broke, nom di dom' ! »
Adon, sins pont fé d' mirlifices,
I lî lét toumer su s' mouzon
Çu qui dj' lomereu on p'tit wachis'
Qu'aveu l' gos d'on fond di scaneçon.

Çu qu' gn-a à dîre :
Si t' djoûwes avou lès pîds d'on chwès,
Waîte à ç' qu'i fuche pus bièsse qui twè.

Pierre Lazard